

多
歲
堂
詩
集

序

吾師誤庵先生既逝之十年諸公子哀集遺詩
文合四卷刻成以示治日子從先人學最早試爲
紀其緣起治拜而卒業則恍如身侍杖屨聽口講
指畫也竊惟先生早歲卽擅吟詠而不以詩稱
弱冠鄉舉魁進士而不以文名中年累官翰苑一
再追隨屬車豹尾之間每和章經進同時咸斂手
推服而曾不備著作掌文衡卒之敷厯中外贈祭
美顯若無與於稽古之榮乃所至獨持大體勿事

苛細堂堂正正不激不隨卽政事而經世之文章
實著焉生平教門人輩學從根柢必無取苟作以
故所自作亦殊不多少日辦香杜韓晚更出入坡
谷誠齋諸家而不徒其貌雜體文古雅典則一宗
先正不爲僞體獎誘後進勉以正學蓋不異所自
爲全集具在可覆按也以治之無似奚足以窺尋
先生於萬一然幸親炙門牆夙承提命厯厯猶前
日事豈遽忘之且焉知後此讀是集不有想前輩
而恨生之不早者其敢以愚陋莫贊一辭也哉獨

是冰生於水而不復爲水風起於木而還折其木
自昔作家淵源不替皆必有所從入然至其離形
得似則未有不若雙鵠之並翔立古人於前與之
各極其至而無與讓者 夫子之不可及又不僅
在區區師法之間已也劉蛻之論曰文章者道德
之光則亦惟其不能已於作而作斯可以觀焉茲
集之刻誠不謂遂以傳 先生然 先生之自爲
傳也不可卽此而識其概與治不肖老大無成重
孤期許旣趨步之末由並弗克謬廁表章之末一

展誦間盡焉不禁涕泗之橫集殆無異波斯匿王
追念母夫人抱持過恒河時已受業劉治敬志

多歲堂詩集總目

卷一

古今體詩一百六十八首

附文一首
詩餘一首

卷二

古今體詩九十四首

卷三

古今體詩一百五首

卷四

古今體詩五十九首

附文一首

載賡集卷上

古今體詩四十四首

載賡集卷下

古今體詩四十四首

附集

試律詩三十三首

賦十首

多歲堂詩集卷一

長白 成書 倬雲

乾隆乙未

是歲爲乾隆四十年時年十六歲

春雨

一夜雨聲遲清寒生薄帷今朝庭院裡誰詠落花
詩柳色青垂眼山光淡埽眉殘春知己盡攜酒聽

黃鸝

丙申

是年入學學使羅公源漢拔取第一

夏夜

萬籟寂無聲疎簾夏夜清荷開香暗放螢轉樹微
明揮扇風生袖推窓月上楹乘涼穿小徑花影逐
人行

蝸牛

蝸牛全其天屈伸復突兀角上無功名壺中有日
月

丁酉時太翁按察公官直隸大順廣兵備道是
年冬往省視有邯鄲縣臨洛關覽古諸作

題太華圖

一生不識華山蹤夢裏嘗登落雁峯今日見圖如

見夢山光不及夢中濃

鏤鎖高懸萬仞梯昔賢曾此涕垂時何當上到投
書處把酒臨風仰退之

贈別

束載發天雄歸與吾道窮功名雲霧裏身世畫圖
中馬走三更月人驚臘日風此邦一爲別前路竟
誰同

紀遊

遊樂善園也俗名
長河在西直門外

百尺危樓置此身金城玉闕本無塵參差井竈千

家日點綴京華十里春雲映波光天在水風開樹
幕鳥窺人不須覽盡西郊勝此日登臨眼界新

郊關三里燦朝霞路轉西南樹影斜紫氣氤氲

天子園

高粱橋迄西
爲樂善園

香塵飛舞貴人車長堤有路

堪行馬野草無名自放花已過小橋楊柳岸山僧

揖客進新茶

平地奇峯五指連何時信得巨靈拳

五塔寺明
永樂時建照

通佛國西留影

傳云此塔無影影在
西域西域入中國但向塔影而行無不至也

穿破層霄上倚天積霧乍開金有色晴雲密籠碧

生煙孤顛九級無人到搔首長吟帝座前

都門五里御河濱丞相祠堂碧草新苔蘚煙寒眠

石馬松杉雨溜暗金人千秋藻鑑推明主一代

勲名屬老臣遊客往來齊下拜天章不朽壽貞

珉

王文靖公墓在長河之北有御書亭碑爲仁廟御筆

林下通渠細水長小橋不正卧斜陽半溪苔蘚晴

痕綠一線波光煙色蒼酒客醉留河畔草漁人慢

鼓畫中槳問津欲到桃源渡樹轉山回路渺茫

青天雨過宿雲開西望羣峯萬翠來石磴懸空盤

樹木煙巒隱約見樓臺渴虹下飲千尋澗旭日蒸
翻滿徑苔遙與山靈期後約會凌絕頂一徘徊

澈底澄鮮水一泓源頭活潑本來清

玉泉山爲
帝京第一泉

遊人乘曉尋新爽釣客垂綸傍午晴泉眼花翻山
石碎波心紋蹙野鷗輕尚方佳品稱難得莫認滄
浪漫濯纓

邯鄲縣

邯鄲故郡古來傳過此停車一問焉遊俠少年多
不見夢仙客子尚高眠金湯百雉形猶壯朱履三

千事渺然故趙城遺址尚在聞說望諸祠近在臨風憑弔

幾流連樂毅墓在其南

臨洛關覽古

牧羊豎子漫縱橫洛水洛關笳鼓爭此日舟車臨

廣路當年風雪望援兵劉黑闥寇洛州絳州總管羅士信死之齊王

進戰猶三月時詔齊王擊之不進郊國捐生唯一城士信封郊國

更有羣忠能從死荒墳羅列不知名士信墓前小塚纍纍皆一

時從死士也

雪後夜行卽事

雪後策羸駟依稀路轉明天清山有色雲靜月無
聲遠樹村燈出平橋人跡輕僕夫相告語戍鼓報
三更

清風店早發

小星三兩淡縱橫茅店雞鳴夜五更雪後空山虛
月色風中落木送寒聲千家井竈衝煙白幾處疎
燈透霧明欸段一鞭二十里行人指點定州城

戊戌

無詩 是歲配
富察夫人歸

己亥

九月鄉試中式 時太翁按察
公官廣西按察使緣事罷職

贈哈望亭

豐阿

同年

宜中古傑士磊落異常人
酒色何妨好英雄自有
真嗜奇如逐臭喜客不憂貧
豎子成名去區區何
足論

庚子

四月會試被落 是歲太翁按察公
以六品職銜作爲哈密辦事大臣

俠

雲天肝膽向誰論
辛苦留將一命存
千古傷心郭
解傳此生不上孟嘗門
久疎賓客藏身固
漸習詩
書出語溫說與邯鄲衆
年少報讐刎頸莫輕言

題乩仙詩

同年哈望亭招乩有仙女白鳳降壇詩筆婉麗如晉宋清商諸辭

舞罷霓裳月浸河天風吹送步凌波想應厭道神
仙語學作人間子夜歌

庚子冬夜招乩於友人之借樹軒有鬼仙仲
子降焉談吐風華詩情弄岸蓋當時賣志以
死者道其生平互相酬答因誌以詩

絕意孤遊二百年知君泉路最蕭然乾坤變動虛
如水滄海浮沉淡若煙旣已有生何惡死寧爲才
鬼不頑仙

仲子自言非仙但鬼之有知者耳

他年我亦歸元化願

執先生欵段鞭

不妨形迹隔幽明
夜黑天陰無限情
久矣人寰無仲子
亦知宇內有成生
焚香喜得金蘭友
歃血聊爲人鬼盟
酒冽劍寒同起舞
君應呼弟我呼兄
北邙山上晝雲昏
何處尋君古墓門
兩列松杉愁夜鳥
五更風雨黯詩魂
楓林月落人千里
荆樹花開酒一樽
寒夜一燈談往事
先生不語氣常吞

明末事
輒不答

問以

橫空浩氣大江寒
詩法先登李杜壇
二十許來好

顏色百年以外古衣冠壯懷都向塵中盡世事徒
從壁上觀仲子自言如二十許人
深衣幅巾生時服也體魄久湮情性
在幽憂傳徧廣陵彈

辛丑

四月會
試被落

草堂二首

一屋大如拳乃在衆山背經年無日色穴窓通微
氣亦有貧主人無營終日睡狼藉筆硯荒爛慢圖
書碎一琴挂十年塵與壁無二我自不知音不彈
非有意

客來主人歡無客靜亦好讀書兒女笑除酒僮僕
惱風雪起朝寒窓牖白皓皓先生不出門徑雪亦
不掃旣甘原憲貧復求侏儒飽但使願無違我生
豈畏老

壬寅

選古詩存
八卷成

鈕祜祿烈婦歌

制府愛公女適相國永公姪部郎伊嵩安夫死
撫弟妹及前室孤凡十年婚嫁旣畢乃以身殉
見邸抄

古來有烈婦夫死殉夫名不朽又聞有賢母遺孤
已貴身老壽一死一生大義全于今視之良非難
君不見燕山烈婦標奇節撫孤殉死一身兼世家
閨秀好門宇相國姪婦尚書女夫壻貴爲比部郎
下馬能文上馬武妾命旣薄君命乖結褵二載君
歸土君疾病妾割股籲地呼天疾不愈弱弟幼妹
苦無依前室無男遺二女衆雛爛熳繞床啼弟妹
呼兄女呼父妾無姑舅亦無兒旁人寧知妾心苦
今日誓將死報君獨立靈前默不語叔翁知婦意

誨慰何諄諄老父知女意挽留淚潄潄家人知妾
意起居眠食不離身盡道夫亡事未已遺孤猶在
將何倚新婦勉爲衆孤留莫使良人遺恨重泉裏
君昔求生不得生妾今求死不能死一聲長痛易
縗麻十載艱辛自此始秋去冬來春復夏課書教
績日無暇男弟成婚女已嫁君在黃泉知不知想
應待我黃泉下與君有約豈食言數歲來遲君莫
訝妾事畢妾心悲託寓十年今欲歸遺詩在壁緣
骨月艱苦不必他人知一疏達天墀貞魂入地時

名卿齊作誄 天子和新詩
相國家風誰繼武尚
書庭訓超往古從來國瑞本家祥
名相良臣生烈女奇節總出忠孝門
紛紛富貴何足數君不見朱門仕女衆如雲
大節惟有伊夫人

偶成三首

激箭年光撚指過鋒棱瘦骨幾消磨
乾坤生我寧無意貧病侵人奈若何
聊以解嘲澆地酒未能免俗飯牛歌
眼前七尺身猶在不負高松學女蘿
屈指浮生足自憑未除豪氣尚多情
文章學得不

龜手身世初嘗骨董羹空負昂藏羞李泌徒驚好
美笑陳平男兒潦倒尋常事但一書空損盛名
三尺青萍忠聖鐔摧殘聊復作龍吟人奴自有封
侯骨公子徒勞相士心漢代功勲輕白屋燕臺賓
客逐黃金驅車欲問神仙事瑤島山高弱水深

古詩存序

古詩之行由來久矣莫先於昭明之選而詩之
根柢不存莫備於鍾嶸之品而詩之精神不存
莫大於河汾王氏之刪述以繼三百篇而詩之
風情臭味又不存之數君子者豈其識有不足
才有不逮哉亦其性情學問之所就者不同故
其趨向亦異而要皆有所未盡也唐以詩取士
專集行世者不下數百家高者取法於漢魏卑

者亦摘藻於齊梁一時豪傑之士若李若杜若韓亦莫不有生平得力之處時出之以示人而人亦不以爲病此皆由天資卓犖不安故常故能出沒變化於古人中以自成一家人之言非如後之論詩者尋章摘句鰓鰓然於聲調詞華之間強古人而就其繩尺也故當其時選家少而詩家多宋之詩人始有分門別戶之見故宋詩不能匹唐元人因之至於明而選者愈盛喜藻麗則宗文選講格律則祖鍾嶸惟河汾之學後世病其僭而不取然而世儒往往取古人之詩以爲某句似風某句似雅某爲君子之言某爲小人之言紛紛不已者則文中子之論資之弊也迄於今詩人愈少選者愈多而究其去取卒不能厭誦者之意此無他以已意求詩而不以詩求詩故也夫黃虞以前者無論已三百篇詩之祖也漢魏詩人去古未遠其學之也宜易而無一人似者晉宋齊梁陳隋猶是也風氣日移性情日易故形於歌咏者亦日變而不知朴者

變而艷質者變而文平淡者變而絢爛質直者
變而離奇此其人非遞相師承而祖述者乎而
各不相侔如此蓋有莫知其然而然者而選家
乃欲執一律以繩之則將使六朝必同於漢魏
漢魏必同於三百篇而後可也如是而言詩一
三百篇足矣三代以下之詩何爲而作又何爲
而選哉余於古詩素所深嗜苦其卷帙之繁而
瑕瑜之混目也嘗欲有所去取以供披吟而又
牽於昔人漢魏六朝體格高卑之說不敢別有
所議因思所以易之者而未有得也間取馮氏
惟訥所集詩紀讀之盡屏諸選家品藻雌黃之
辭不觀而獨與古人之詩相晤對讀之既久而
後灼然若有所見也夫然後知詩固無不可選
向皆爲衆論所囿而不能出耳且有至公且當
之則日思之而不得而今得之矣然則若之何
而選之曰吾唯其佳者而選之而已分而論之
漢魏有漢魏之佳者六朝有六朝之佳者合而
論之有古而佳者有新而佳者有鄙俚而佳者

有典雅而佳者有莊重闊大而佳者有輕靈瑣屑而佳者總而計之有工而佳者有拙而佳者有不見其工拙而亦無不佳者則亦有工而不佳者拙而不佳者不見其工拙而亦究未嘗佳者求之以心應之以目欣欣焉惴惴焉未嘗斷以已意未嘗間以人言未嘗人棄而我取思入者之或有所濫也未嘗人取而我棄思出者之或有所遺也未嘗人棄亦棄人取亦取思隨聲附和之於詩無當也如是者年餘始卒業手自抄錄畢命之曰古詩存庶幾古人之詩無不存也客有問者曰子之意則誠善矣抑亦有所本乎曰吾本於昔之論詩者而已矣藻麗存焉格律存焉一代之詩卽一代之風雅頌所謂繼三百篇者亦無不存焉綜其全而括其偏辨其失而收其用河汾大儒之學余何敢言昭明之泛鍾子之鑒吾知免矣

癸卯

是歲太翁按察公以失察哈密通判某犯職事例應代賠賠項萬餘金家產悉以償

官猶不及十分之一旋蒙恩將未完賠項
盡數豁免博約特太夫人率子若孫稅屋西
城之南溝沿以宅凶多病復遷於西直門之
鷹房衚衕讀書永泰寺七月長子克星

額

生字恒叔道光壬辰科進士

論詩絕句

當年總角學吟詩欣奉先生杖履時記得西郊十
二律編珠織貝好才思

制詔文章郊廟歌風流儒雅世無多晚來教子讀
文選杜老家風定若何

出守曾聞閉閣思神明一載正賢時雲川亭畔遺

民事能誦春風垂釣詩

一代宗風仰退之回瀾大筆足淋漓當年一律承
青盼慙愧逢人說項斯

一行作吏厭萋菲瘦馬單衫落魄歸不是催科書
下考詩囊正比宦囊肥

人傳鳳嶺壁間詞借樹軒頭說鬼時如此鬚眉兒

女態六朝文筆晚唐詩

哈望亭 望亭所居鄰有
老槐一章垂蔭過牆書室

適當其下遂顏
之曰借樹軒

清詞一曲鷓鴣天小謝風流憶往年總使才華傷

婉弱步春時女正堪憐

國仙芝

詩辭一例吐清新片語精微妙入神便使鍾譚非法眼也應愁殺鈍根人

洗兒

新得駒兒骨相良未形頭角氣騰驤謬傳英物啼頗肖願到公卿齏不妨課子詩憐老賓客傳家書愧大歐陽殷勤囑爾無災難好待分甘上畫堂

喜楊喻齋

明義

秋捷

不作旁觀羨相知有淺深十年失意客半世讀書

人愧此他山石足君空谷音春風偶然事漫聽看
花吟

贈毓牧庵 新布衣

青白當時眼知君復幾人
佯狂諧世俗辛苦爲天
倫嗜酒憐同病談詩獨有神
男兒未了事珍重撥
荆榛

甲辰 四月會試中式 廷試三甲以部曹用簽
分戶部秋部憲差委 東陵有薊州道中

作是歲太翁按察公
內召補禮部主事

薊州道中

豈不憚行役頗隨汗漫遊遲迴斷嶺路蕭瑟暮天
秋邊月隨征馬山城靜戍樓當年籌筆處臨眺幾
淹留

薊門形勝地策馬獨臨關遼海蒼茫裏幽燕指顧
間白雲迷遠塞黃葉淡秋山憑弔情無極非緣怯
險艱

地盡黃花戍平沙雁影過寒雲時作陣秋潦不成
河石路蒼苔古夕陽紅樹多長途慣鞍馬得句付
謳歌

乙巳 在戶部

代蘇价人贈其鄉人

童穉親情舊相知恨不深衆中唯我去別後見君
心渭水流何極秦山影易沉先人敝廬在回首一
沾巾

太息西園樹秋風正怒號十年別墳墓萬里事弓
刀常恐樵蘇及誰分護惜勞殷勤故人意親爲剪
蓬蒿

已竊郎官軸天章到九冥煩君將此意爲我告先

靈久客意多感故人誼可銘無由酬至德說與子

孫聽

丙午

無詩 在戶部 是歲太翁按察公在
禮部主事任休致 閏七月長女生

丁未

無詩 十月補
戶部福建司缺

戊申

無詩 在戶部
校四庫書

己酉

無詩 在戶部 五
月第二子那丹珠生字萬石嘉慶丁丑科進士更名那斯洪阿

庚戌

無詩 詩餘一首
附入 在戶部

滿江紅

題常部郎閉門種菜小照

種菜荒園此健兒於今老矣憶當日鬪雞走狗藏

亡匿死千里風煙當路塞十年花柳長安市驀相逢樽酒話平生奇男子心中意常如此眼前事何堪彼但呼牛呼馬聽之而已何必讀書求上第但能痛飲真名士到劉伶墳上待君來君曰唯

辛亥

四月遷翰林院侍講

卽事四首

堆盤瓜瓠老且堅于以湘之清冷泉老妻佞佛能淡食下飭不須調薑鹽自云此味淡彌旨土膏氣與梁肉似天生我口寧啖此如卿言亦復佳耳

三十猶貧心不恥，敝裘疲馬長安市。男兒生計負
頭顱，旣不封侯當餓死。盍無斗儲桁，無衣癡兒索
飯妻。啼饑先生大笑出，奇計何不明朝食肉糜。
破窓無紙依敗堵，秋風吹貧作秋雨。先生不以貧
傲人，久貧不慣作貧語。羸童赤腳冒雨歸，賒酒不
得形神悲。一笑謂童無復爾，乃翁正和止酒詩。
大兒讀書支兩頤，小兒跳踉無不爲。貪華風雨數
百過，雨絲洒面風吹衣。晚餐無佐雜醯醬，兩兒不
食默相向。努力加餐兒勿啼，汝曹具有食肉相。

壬子

二月轉翰林院侍讀
五月遷翰林院侍講學士

蹕

上啟元上人用東坡韻

古峯無宿青寒泉有餘冷學道昧其機藕若縠帶
穎有生墮世網涉火見燔炳一醒豈無時積夢非
眞警道人天眼豁萬念付幽屏惟有度人心如有
欲未逞手持一寸絲繩我百尺井謂言脫沉淪用
力莫如猛我今苦形勞日以身徇影妄擬有所爲
未暇樂清靜孰知出世法不在無人境孤雲時度
岑微月自生嶺紛紛變恠場能入味亦永再拜謝

道人安心吾欲請

癸丑

無詩

在翰林院

三月太翁按察公卒

九月奉博約特太夫人傲居於西四牌

樓臭皮

衡衡

甲寅

在翰林院

輓哈望亭

豐阿

天意渺難測人間失此人吾能爲痛哭君豈怨沉
淪奇節世應見孤兒貌不貧亦知定千古歌歎付
交親

三五中元日君來過我廬誰知是死別還擬問幽

居隔巷飛丹旆迎門見雪裾驚心翻若夢無淚灑

階除

望亭於中元日過飲去時依依若將久別者經旬不通音問心甚疑之爲牒二著皆見死

兆急命駕訪之則於

前一日已下世矣

奪我千秋鑒還君百尺樓品因窮愈見才與命爲

譬絲布衾三泮桐棺板四周斂形歸冥漠生亦富

黔婁

癸丑闈中望亭已中式榜前一日忽撤去薦主某深爲扼腕親訪至家曲加慰藉

把卷眸如月雄談氣若雲低頭就繩尺降格論詩

文一第寧須溷千秋孰與云同年兄弟在相向哭

劉蕢

望亭史最熟偶舉一事皆能指其篇頁談吐名雋有魏晉人風致玉屑罪罪恒一座傾倒

家世孫吳學昇平敢自名人唯歎潦倒帝亦惜豪
英牢落封侯骨蒼茫宰世情修文如不屑天上有
機槍

當年班定遠不入玉門關萬里魂歸日終天恨未
刪有生唯飲泣一死且承顏我有思親淚如君何

可攀

望亭尊人英公會任四川總兵從
征金川後因公謫戍卒於戍所

先子人倫鑒君蒙國士期相看如骨肉此去好追
隨若問年來事爲言地下知有孫皆誦讀家學不
參差

苦語憶猶在遺文散未收報君以不朽此責在交
游更以平生意思爲身後謀他年定相見魂去莫
淹留

乙卯 五月扈 蹕灤陽 九
月轉翰林院侍讀學士

題烏梧軒 魯圖 木芙蓉畫

彷彿曾看夢也真亭亭艷影小花神碧雲樓畔休
相避我是蓉城舊主人

三山事息奈情何玉按珠簾領受多剩取餘情通
浩劫羅巾別淚憶雙蛾

灤陽道中

時扈 蹕幸
避暑山莊

萬樹上朝曦
千山轉翠旗
霜雕大羽箭
天馬紫金羈
侍從慙文學
前身應健兒
甘泉作賦者
投筆可如斯

侵早犯霜露
暗行僮僕嗔
沙明遠水曲
月落古城堙
疲馬不驚夢
怪山能惑人
前村人正睡
應厭曉雞頻

扈 蹕幸避暑山莊紀事絕句

端陽節至麥風溫
郊祀初回萬馬屯
避暑年年

循往例

年例於郊後啟

北

千官送

駕大東門

鸞旗翠葆出圓明近野居民夾道迎不用羽林傳
警蹕兒童相戒各低聲

委蛇輦路絕塵氛旗影徐飛樹影分正是久晴新
雨後清河橋下水泔泔

相國行輿步驟遲每隨雙纛望前麾

御纛前皆御前大臣

及乾清門侍衛扈從諸臣在御纛之後八桿
旗之前扈從者例皆騎馬時惟王董兩相國乘轎
書生也忝從行列驚馬常先八桿旗

趨撥如飛健步軍每經村市避行人

乘輿所至凡遇村市湊

集處則粘竿拜唐阿及綠營健步在前步行警蹕
謂之走噶山噶山者村也亦謂之走撥凡走一撥
下卽乘馬從寬轉馳向道旁樵牧多如織不近
前撥以待謂之體撥
鑾輿總不嗔

白褶前驅後赭黃
虎槍營皆衣白褂
乾行營將
清門侍衛皆衣黃褂

近趨行忙營門下馬看林立殺虎將軍蠟桿槍

沙孤堆上望行旌萬騎如雲按隊行豹尾遙分成

小駐蘭溝河畔有尖營
沙孤堆在蘭溝河
之南積沙成阜

草軟沙輕輦路平石漕南畔認行營下門列帳還

相勞屈指灤陽第一程
駕入行宮百官齊集謂
之上門晚膳後散歸帳謂

門之下

風山口內路迂迴土壁中間一徑開轉過坡陀三

四里青山如面向人來

至此始見山

已近懷柔風候殊山城如斗勢盤紆鑾輿過後

街衢靜閒坐農民說免租

詔經過地方特予免征

歲歲居民望翠旄密雲一帶沐恩膏迎鑾父

老能追憶六十年來卅八遭

逆旅老人記憶甚悉亦絳縣之儔也

屈蟠妙筆寫荆關鐵榦虬枝翠靄環誰識百年培

養力九松山作萬松山

山初有九松故名今則不下萬株矣

萬馬連鑣靜不聞
千山盤折翠旗分
南天門上傳

朝膳遙見金輿入五雲

南天門在萬山之巔乘輿小駐從行仰視黃

屋翠蓋皆在半天

小邑當衢百貨陳
連宵燈火聚行人
傳言石匣藏

靈怪欲訪奇聞說未真

傳聞有石匣在巡檢署堅不可開故名問之土人或

云不知或云有倉卒一宿不能往窮其迹也

白鶴澗溝風日晴
山頭澗底白雲平
下山卻望來

時路人在長空木杪行

邊風颯爽陣雲屯
古北雄關鎖斷垣
十萬貔貅齊

勒馬元戎環甲立軍門

時古北口提督陳兵迎駕

一色驚黃孔翠斑北來嘉客覲

天顏

蒙古於本朝爲賓

客見

御

製詩註

問安纔畢齊乘騎便入乾清侍從班

蒙古

諸王公多有在

御前行走者

關城回望五雲中路入平川馬首東千里灤陽分

別派雙橋如虹駕晴空

竟日看山眼漸明一山未盡一山橫欲窮絕塞峯

巒秀清曉來過巴什營

巴什營直南山峯巒秀絕

關門內外隔溫涼

出口後氣候稍寒

七站中間此站長路

轉峯回迷向背 御營近在兩間房

茅屋石牆處處皆山家留客小安排晚餐莫謾愁

沽酒御道中羅買賣街

御營前多支布帳貨食物酒果謂之買賣街

小戶編籬逐徑成村庄兒女善經營晚涼動我歸

農興羨殺山田帶月耕

雨後泥深馬不前解鞍小憩古城川行人說虎日

將夕榛莽無邊風颯然

地多虎

駝裝深夜走前營

部院各官下門後無事輒鈴鐸先一日啟行謂之走前營

聲聞歌笑膺寬轉莫愁官道失路旁懸得火毬燈

墊夫於路之兩旁隔數
步懸一紅燈夜行甚便

石嶺盤空一徑開爭途隔夜苦喧阗
青石梁路仄
陡險車行甚

艱
驀看車騎分頭避嚮導先鋒躍馬來

鹿角杈枒當道橫
鑿輿過後放人行山頭地底

遙相應盡是鳴鞭叱馭聲

老嶺纔過又陡坡
過青石梁數里卽
黃土岡路亦陡險兩峯相望鬱

嵯峨中間平坦無些子銜尾駝裝絡繹多

羸童從未習征鞍相失方憂覓路難不道歧途成

捷徑公然先到

御營盤

僅乘疲羸相失在後石
梁逼仄別無歧徑不知

何由先到也問
之亦不能自言

常山別殿午陰濃
謾謾寒濤靜院松
誰識九重

無限意雨憂行旅
早憂農

是早大雨扈從者皆沾
濕僕御車馬行泥淖中

恭讀御
製詩云云

侍從清班愧不才
橐鞬日日上門來
黎明忽失前

宵路此處宮庭向北開

常山峪行宮背
南山而建北向

鞍嶺當年宿落暉

余於壬子
扈從宿此

村童放學抱書歸三

年重過依稀是一樹
垂楊地主非

雨氣空濛夜氣涼
嚴裝夙駕曉行忙
侵晨忽散千

山霧策馬先過三道梁

遠山隱隱見周牆望近誰知路尚長盼到河屯營

裏住計程明日是山莊

喀喇河屯行宮
距山莊一站

斷嶺回坡路折盤曉行人在畫圖間灤平迤北無

喬嶽一帶倪家平遠山

雙塔山頭處土祠躋攀無路到今疑曾聞有詔

搜奇蹟野韭盈階木主欹

一土臺在山半高十餘丈中分爲二四圍壁立

如削上有瓦屋三楹

歷無登之者聞往歲

乘輿

經過

詔遣人視之梯而上室中設香爐木案塵

積數寸一木主題曰王仙生之位屋前地半弓種

野韭數畦甚叢茂不知爲何人之祠問之土人亦

不能知其
所自始也

邊城寧虞生計微八旗蕃富似京畿

熱河設八旗
駐防副都統

之領健兒站道誇身手一色鞭刀短後衣

齒髮雖衰精力存黃衣諸老沐天恩道旁稽首

還相告矍鑠應須遜至尊

輦路和風塞草薰提鑪香篆氣氤氳廣仁嶺過仙
園近望見山頭五色雲

十里長街馳道通遙聞仙樂入離宮內臣傳旨

千官散麗正門前日正中

草創規模質不雕

山莊爲聖祖所建檼
楹皆本色無丹雘之施茨茅階

土仰神堯文孫繼武無增飾奕葉欽承儉德

昭

禁扁當門

手澤垂

避暑山莊額
仁廟御筆百年堂構繫深

思兩旁素壁無多地盡刻

今皇感舊詩

二宮門
壁間石

刻最多皆

御筆也

日午當天火繖張薰風前殿送微涼戟郎侍值輪

番入內藥仍頒祛暑湯

門側置朱漆桶
貯暑湯冰水

遊豫何嘗慰睿思每憂水旱問瘡痍從臣召對

無虛日纖細都勞 聖主知

楠殿薰風婆律芬 山莊正殿棟宇皆楠木 小臣曾此切瞻雲

臣書壬子扈 蹕蒙 今番更荷如天寵獨聽 君

恩 召見於此

王論典墳 臣書今歲召見蒙詢及詩賦制義併問能為古文否因論古文法度 聖

學淵深茫 乎莫測也

傳餐已下引諸曹虎衛拏門執錦條 駕未出以前門盡闔侍

衛執環條以俟 駕 闔闔未開人語肅正中黃帕

至門闕謂之拏門

御牀高

校射宮門集俊髦 駕時出看 舊家風俗習弓刀

諸臣習射

書生合作千夫長三發親蒙

睿語褒

臣書中三矢得賜

金焉

親王挾矢

御墀頭龍種英雄壓輩流孔翠驚黃

新賜得

天閑騎出紫驊騮

鄭親王連發五矢皆中詔賜三眼

花翎黃褂
內廐馬

天藻頒來雪日光詞臣奉

詔愧枯腸烏絲繭紙

剛謄得中使傳宣進和章

皇上萬幾餘暇聖製詩章日有程課率

命扈

蹕詞臣和韻隔數日輒一彙寫呈進以

單紀數前詩甫繳次單卽下

奎文炳煥富有日

新實曠古所僅見臣書以翰林講

官隨行亦得一體恭和深慙忝竊

射生人集曲城隈白鹿黃羊攜載來內侍迎門先
導入御前都尉打鮮回

山雨吹晴不作泥侵晨有

詔幸須彌

寺名札什倫布蓋梵

語也譯言須彌福壽見御製詩

流杯亭外排

仙仗水長沙平

輦路移

梵宇浮圖高出霞下瞰城市如塵沙撞鐘吹螺迎

大駕輦前無數金蓮花

毡裘君長沐

殊恩泥首宮門

聖語溫六十年

來勤

教養諸蕃一體等兒孫

皇上臨御六十年來釀化覃敷

德威廣被塞外諸蕃王俱每年隨侍行在有
祖孫父子游歷數世者教養恩深淪肌浹髓固
已中外一家

巴林盟長已華巔拜跪依然禮數虔聖主非常

賜顏色念他侍從幾多年

巴林王爲諸蕃盟長年近古稀瞻覲時猶跪

拜如禮無衰遲之態仰徵聖人久道化成故一時壽寓同登蔚爲世瑞如此

無數明駝卧近郊殊方貢使面頰頽沙堤十里平

如掌一例排支蒙古包

朱輪黃蓋傍天門中使傳宣哲木尊

哲木尊西藏喇嘛名

號秩亞呼圖克圖

召對出宮還默坐西來大意本無言

九齡稚子悟前因又見章嘉萬劫身逢著舊交都

色喜可知渠是再來人

前章嘉呼圖克圖住世時道法神異最蒙優眷示

寂後復轉輪闡教今九歲矣來行在見前身所素識諸人仍慰勞如平生歡

捧 詔名卿見佛回法輪自轉不須推丹書未遞

行程緩堪布先期進馬來

喇嘛來 覲進梵書通帛頂禮志虔名丹書

堪布亦喇嘛之有品秩者

振古奇功一日收捷書驛遞看星流宰臣入賀

天顏喜曠典頒來如意舟

如意舟乃御園中別所於水中疊石爲洲全

作舟形故名

會龍山色曉空濛萬壑朝宗一派通錫以嘉名應

爲此荒唐野語付齊東

會龍山水爲衆水所歸故有是名傳言下爲羣龍

所聚殊屬荒誕

矗矗孤疣插斷崖山靈應是費安排依然頑石和

沙礫笑殺談詩薩質齋

磬捶峯俗名棒椎山孤峯拔起上豐下儉別無環拱

狀極奇偉同官薩質齋曾有詩云云

山勢高低一徑開石城內外隔塵埃遊人莫傍牆

根語 聖駕方從西峪來

羅漢山頭羊骨灰回官作法召風雷傳聞札韃生

牛腹能致蛟龍送雨來

遇旱時同人輒於山頭燔生羊誦回咒祈雨頗有驗

蓋其國俗也

札韃似石卵生

牛馬腹中亦同人禱雨所用

簫鼓喧天達

禁宸土風祈雨走比鄰柳圈帕首

胡旋舞寡婦童男笑殺人

俗間祈雨多折柳條作圈戴首

惟有山田望澤殷經旬不雨便如焚忽聞好語傳

鄰叟僧帽峯頭生白雲

僧官帽山名也土人每瞻峯巔雲起爲雨候

宮牆下視小西溝退食宗藩羽衛稠忽地下興騎

馬過始知

天子在樓頭

吹面西風酒力微好山無限淡秋暉碧天雲點長

空靜望見 宮庭白鶴飛

荒山如赭碎秋菅遊牧兒童驅犢還望見 仙園

規矩草始知雨露勝人間

塞外土肥草長高不見人然俱離披蒙密可憎

獨 御園內所生修僅數寸一望如翠屬平鋪略無半莖參差錯出者可異也俗呼規矩草

中元法食集羣僧迎水堤前梵唱興十里長渠通

禁苑 御溝牆外看河燈

中元節施食作佛事放河燈一如都下

花炮聲中璧月圓中秋煙火二更前居民都向山頭望紫電金蛇滿碧天

離宮秋曉瑞光寒

壽域洪開萬國歡禁尉鳴鞭

仙仗肅二層門外拜鵲鸞

鵲冠奇服遍城闈盡是梯航祝設人萬樹園中

開御宴湛恩亦許到陪臣

八月十六日爲聖壽節每年祝

設後例于萬樹園賜宴諸王公大臣有外蕃使臣亦

恩許入宴

廣場迴望靜無塵走索跳丸百戲陳候子僊倡排

兩列御前先喚摺交人

開宴時百戲具陳輒宣善撲高等人員令於

御前相撲以角勝負

名是吳歆及越吟踏歌連袂走相尋熙朝樂舞

聲容備不廢兜離僛佻音

大樂奏時亦有回部樂舞用鄉語聯臂頓歌其

樂器形制絕奇古非所習見我朝聲教遠訖樂
備萬方鳳儀獸舞之盛虞廷不得擅美於前矣

甫田秋宴仰同仁

甫田秋樾亦御園別所

金帛頰肩

異數

頻拜賜向來皆九列

君王特旨入詞臣

鈴索無聲晝漏稀時平微物亦忘機一雙白燕衣
如雪來傍宮牆故故飛

邊城五月似春陽盡日山行挹衆芳饒有風姿草

芍藥略聞芬馥野丁香

草芍藥草本小花鮮紅灼灼劇可愛絕不類芍藥也

野丁香亦口外野
花形差近似香遠遜

石洞飛泉一道斜坡陀背轉少人家平岡十里無

行道開遍空山桔梗花

桔梗花山間彌望俱是初不產水澤也

僦居多在兩山頭退值還爲蠟屐遊芳草鋪茵榛

子峪石林飛雨水泉溝

峪中平岡迤邐芳草芊眠饒有畫意退值後同人相

與攜樽藉草竟日忘返泉傾瀉亂石間繁響琤琮如琴筑競奏

禁院風清絕點塵冷官無事稱閒身朝朝太僕朝

房裏揮麈清談似晉人

炎威尤畏日西斜邊地無冰酷暑加夜半酒蘇肺

疾作床前留得枕頭瓜

地產瓜形皆橢圓頗不類故有枕頭之名

詩情畫意總相關退值離宮鎮日閒數點斜陽

紅樹晚碧峯門外看秋山

滿地清暉興未闌孤吟無奈夜燈殘中秋節到歸

期近御製詩交第四單

年例聖駕以八月望後迴鑾

山村茅屋自高低荒草連天曲徑迷黃葉滿街秋

巷靜隔牆聲喚賣酸梨

土產酸梨劇佳

勝跡都從遠處搜一官羈絆苦淹留秋涼一枕遊

仙夢夢入朝陽洞裏遊

朝陽洞爲此地名蹟遇駐蹕時遊人甚夥余以去

寓舍遼遠竟

未得一往

題富庶子

森布

西溝竹枝詞

聞說西溝住莫愁春華庶子擅風流錦囊風月三千首也有閒情賦冶遊

故李將軍載酒過蒼顏如赭氣橫磨西山射虎歸來晚不畏郵亭醉尉訶

嘉慶丙辰

在翰
林院

小瀛大兄

岳起

移居用田山蘊韻

碧幢使者貧無車歸來兩載三移家一官懊惱不得意自知野性如麇麇閉門窮巷對雞犬大勝擊鼓排官衙短牆及肩朝日上浮圖倒影風中斜萬

松老人棲隱處妙迹應現優曇花先生寧合久住
此如狄居穴枝棲鴉擁衾獨坐聽更漏却憶江夜
迴颿撾破窓無紙漏星月補苴尚欲煩義媧小瀛時官
布政使以疾歸居德勝門內三遷其居至東安門
之磚塔衒衒巷口市肆後有金源時萬松老人之
塔衒衒以此得名

順庭 三多 贈水仙

凍雲凝寒月無色觀星夜墮離橋側姑射仙人破
曉來亭亭玉質當風立自然孤韻出塵俗豈獨傾
城向水國生嫌絕艷損天真幻作黃冠寄超逸誠

齋老子無雅語商確金銀如市估涪翁坐對出新
意礬弟梅兄漫相許豈知娉婷絕世姿不與時花
爭媚嫵唯將雅度勝流輩自向荒寒結儔侶若待
東皇品衆芳姓名定入無雙譜紅村居士花爲門
蓄養羣卉如兒孫尤愛此花看不足疊石汲水忘
朝飧憐我西齋太寂寂惠致百本連鬚根芳叢失
水氣未展淡意已足清人魂愧無仲囡古罍洗何
地置此金玉昆癡兒妙解乃翁意拂拭几案羅瓶
盆昨夜西風何太怒嶺頭折斷梅千樹崖松澗竹

色憔悴縱有清操無勝趣何如茅簷低暖小窓明
泉石依然抱貞素先生畏寒不出門獨與此花同
歲暮

丁巳

正月遷詹事府少詹事
十月遷詹事府詹事

蔡葛山先生新九十壽

盛世耆英出松喬慶在茲家聲鐘鼎煥品望斗山
差學海原無極天衢路不歧龍飛初紀歲鸚薦
正逢時芸閣藏書秘花磚度影遲清班參侍從文
柄任操持入館神仙客升堂帝子師亮工歸贊

畫分職見猷爲惟相邦之重如公世所資鹽梅欣
有畀霖雨被無私 至治崇文教三雍盛上儀園
橋欽鉅典奪席繼前規一德承優渥 殊榮邁等
夷引年臣分足予告 聖心維竟愜抽簪願時深
望闕思百齡歸老秩 五代送行詩綠野堂初闢
黃扉志未移酬 恩千古遇教子一經遺上壽滋
芳菊嘉祥兆瑞芝算忘新甲子科譜舊干支自顧
葑菲質欣蒙化雨施兩番經拂拭十載憶追隨欲
擬岡陵祝多慙絕妙詞濡毫呈綺席聊以當金卮

戊午

二月遷內閣學士兼禮部侍郎銜七月
充順天鄉試監臨十月充順天武鄉試

正考官是月第三子
碩隆武生出嗣仲兄

和達瘦石 慶韻

少年打鼓騎屋棟中年嗜酒眠糟甕邇來氣質又
一變如服轅駒任韉鞵亦知宦久風情減况乃愈
遲瘡痍痛分無囊醉壓松肪但取蔬盤供藥朮感
君欲活釜底魚奇文時吐胸中鳳可憐原是醉鄉
人忍把新詩翻舊夢千秋萬歲別有事參軍僕射
誰輕重有酒不惡無亦佳那能更冀花間送君如

螫腕斷未忍我似土牛鞭不動不如攜榼抱琴來
與君且作清溪弄

己未 二月遷居磚塔街衙即小瀛岳藩司宅
四月充 殿試讀卷官 五月兼正藍旗

漢軍副都統 九月遷 盛京兵部侍郎
十月奉博約特太夫人至瀋陽

寄薩質齋 杉圖

寄語天石子此行常晏如吟懷須少減酒膽莫頻
舒長日應談鬼餘閒或讀書酬 恩他日事莫負

好山居 時質齋官內閣學士以事謫降
泰陵筆帖式寓居半壁店

庚申 在瀋陽 二月轉 盛京戶部侍郎 是
歲奉 命考取 盛京宗學覺羅學教習

古詩效山谷體送程禹山

虞卿

回都門並以

誌別

禹山耿介人傲骨當風立
萬齋冷如冰俗客不敢
入相逢遼海上衆中獨我揖
頗復稱相知胡爲久

於邑

時客筠莊
司寇第

作詩本細事亦足見人心
常將山水意聆此金石
音百唱不一和聊欲造之深
結習信非偶水乳定
前因

佳人絕代姿可愛不可褻
有貌不傾城幽閨自愁

絕標梅誠可念非禮意不屑東鄰富家女嫁早傷
晚節

生無富貴相濫藉文字場吾方諱其短君乃售所
長君文有奇氣如龍馬騰驤正恐不免耳無爲歎
行藏

今日忽不樂送君無一言君行策高駕過我舊里
門吾豈不欲歸羈絆難具論駑馬戀棧豆狼云報
主恩

我友劉子治乞食在都城其人古君子讀書不求

名君往試見之可與談平生相將爲古學庶免俗
慮紫

贈呂伯虛

冲

廿載論交地相知此最深雪泥紛聚散雲海共登
臨不負平生學依然莫道心清風故人意嚴暑詎
能侵

時伯虛相從在瀋陽因事辭
去值端陽節書詩於簑贈之

滄雲先生

李棻

以滿城風雨近重陽排嵌成

詩組織工絕刻期索和先生大雅必不樂爲
此狡獪特欲相窘耳勉強補綴未免婢學夫

人聊以效顰不堪寓目也並上戰齋將軍

晉昌

雲海蒼茫此望鄉滿城風雨近重陽故園登陟懷
羣從老圃荒寒挹晚芳興到詩章偏耐思秋深客
夢總能長誰知愛酒陶彭澤孤影揮杯夜未央

秋光已作十分涼不負黃花醉一場千里音書勞

遠夢

都中故人書至

滿城風雨近重陽知公有意徵詩急

酌我無多恕酒狂再浣寒衣驚客鬢平生世業幾

亡羊

苦憶家園柿葉黃

瀋陽無柿

斷橋衰柳一行行

寓東偏有園頗

饒花柳前司

元戎小隊時相過

散齋將軍

傲吏新裁許

農榮公柱策

寄將

同年海城令陳春煦餽菊

到眼煙雲看變態滿城風雨近

重陽

留都氣候寒先覺遊子無煩歎履霜

旅懷宦況兩茫茫坐起惟餘書一牀佳節無聊憶
松菊倦遊我欲反耕桑登臨自昔多狂態騷雅於
今有別腸盡括前人舊詩句滿城風雨近重陽

雞粥歌和李滄雲先生

蔡韻

五鯖十品不易得蓬麪槐齋難爲食王羹太濃相
粥膩雜以芳馨尤矯飾先生服食慕古淡力驅珍

錯歸饘粥太倉五斗日可糴公膳雙雞洎可漉朝
同呼我過小齋晨煙正起新炊熟素瓷注玉滑流
匙空腸得暖春滿腹豈將異味誇友朋更喜餘甘
到僮僕我本長安乞食人廿載齏鹽問苜蓿一朝
肉食羊蹴蔬幾度思歸雞餘肋 留都米賤牧畜
蕃飽食懷慙肩獨倏便欲從公乞此法樹柵編籬
憶初服長腰細搗顆粒均秋卵漫喫生成速蓬頭
曳履好相尋仍乞公詩日三復

辛酉

無詩

副都統內

二月以工部右侍郎鑲黃旗蒙古
召旋轉工部左侍郎是月奉

博約特太夫人回都 四月第四子和舜武
生是月轉兵部右侍郎 八月管理 咸安

宮官學事務 九月調鑲藍旗滿洲副都統

十月遷居於德勝門內新開路入都後俄

居於西四牌樓太寧侯衙門是年大雨房盡

傾圮同年法司成有空房一所因僦居之

壬戌

無詩 正月充 經筵講官 二月 命

八月署戶部侍郎 四月轉兵部左侍郎

癸亥

閏二月第二女生 三月充繙譯會
試知貢舉 七月管理光祿寺事務

爲奴子楊安題照

丹青異土木往與形骸左神本在阿堵餘不似亦

可佳爾慕清風自命不委瑣將身入畫圖位置無

不妄高柳鬱婆娑
池蓮香婀娜頗似忘機人倚欄
雙袖鞞紛紛名利場奔競若星火
相逢話林下彼此俱未果爾豈知
退恬吾實慙衆夥作詩題其顛
一笑乃非我

甲子無詩四月遷居東單牌樓無量
大衛衙餓居價昂貴或言東城有
特撫軍入官房間尚無人居因遞呈
認買以每年俸銀減半扣抵七月以
事部議革職蒙恩改降四級調用十
月補翰林院侍讀學士

多歲堂詩集卷一